



PRIX LIGNUM Vischnancas bajegian adina dapli cun lain

(fmr/gc) Il maun public bajegia adina dapli stabiliments da sport, scolinas, scolas e chasas d'attempads en lain. Ils megliers projects vegnan proximamain distinguids cun il Prix Lignum.

Sch'ins guarda tge quantum da laina ch'è vegnì duvrà l'onn 2017 per eriger stabiliments dal maun public è il dumber da tals en lain creschì entaifer ils davos tschintg onns enormamain. 2017 èsi stà trais quarts dapli che 2012. Da gronda muntada persunter è stada – tenor ils interrogads – la construcziun ecologica, il curt temp da bajegiar, il clima empernaivel en las stanzas e la percepziun positiva da la populaziun. Las experientschas èn stadas bunas tant tar la construcziun sco pertutgant il mantegniment. 90% han ditg ch'els hajan applitgà be lain svizzer. En l'avegnir vegnian ins anc a duvrar dapli lain svizzer. Duas terzas dal gaud svizzer apparteg-

nan a las vischnancas. In fatg saja numnadamain ch'il gaud vegn nizzegià me-mia pauc ed è perquai era vegl.

Cun il Prix Lignum vegn il diever innovativ, da gronda valur e d'avantatg per l'avegnir distingui mintga trais onns, saja quai tar stabiliments, l'interiur, mobigliar ed era tar lavurs artisticas. En tschintg grondas regiuns svizas vegnan premiads en l'emprim, segund e terz rang ed in dumber da distincziuns dad ina giuria regiunala independenta. Tranter ils emprims trais premiads ord las regiuns vegnan dads dad ina giuria svizra trais premis naziunals: aur, argient e bronz. La «Vischnanca svizra» è partenaria da medias dal Prix Lignum 2021. Lavurs pon vegnir inoltradas dad architects, projectaders, patruns, construiders, incaricaders e dad artists.

Per la concorrenza 2021 astgan be objects e lavurs vegnir annunziads per il Prix Lignum ch'èn vegnids realisads tranter il schaner 2017 ed ils 31 da mars 2021. Il termin per s'annunziar dura dals in da december 2020 fin ils 31 da mars 2021. Projects che n'èn betg realisads entaifer quest termin u già vegnids inoltrads per il Prix Lignum 2018 n'èn betg admissibels.